

U pas tutuun te koloto menai e Pol tere TIMOTI

¹ Alia e Pol, a aposol tere Iesu Kristo. E Sunahan te lu pouts raiou ra na e Iesu te hamana riarā nori i hopō kap silei lia tego aposol uu lia. ² Alia e koloto menagi u pas teka i tamōlō, O Timoti! Alō e heremi a pien hamana koru i tar te hamana hoboto uarara tara Tsunono. E Sunahan e Tamarara na e Iesu Kristo a Tsunono, e tatei hale rilō a niniganiga na nitaatagi na masalohana.

A toukui i haleien i Epesis

³ Tara pōata tu la uu lia tara provins i Masedonia, alia u ngili alō go kakaia tara taun i Epesis, ba lö te hapiou rem a palair u katunura i Epesis te hihatuts ner u raranga u gamo. ⁴ Na nori e gima tatei ngil koruei u hahatate pinopino na e gima hakoloto has nai a solo a para turu tuburen. Taraha, a manka teka e habutena a hiaraharaha. Na ema harōto nanei te markato uana e Sunahan, a man toukui i tanen e takui na turu nihamana. ⁵ Kaba a ka koru tegi habuti ra, aragi halakasi u hiangilngil te la nama turu tori u gogoso na u hakhakats u niga, na te hamana haniga koru riarā tere Sunahan bara te atei sil talera ara e möa ta töa ta ka ta omi i peisarara.

⁶ Kaba a palair u katuun i la halhal bani a markato a niga teka bate habirits siler tegi ranga papala menai a man ranga pinopino. ⁷ Nori u tson atei tara Lo e ngilin hihatuts ner a Lo tere

Sunahan, kaba nori ema atei sileri a manka te ranga naren, noahasina te peieren u ranga i taren e manana.

⁸Kaba ra e atei silera a Lo tere Sunahan e nigana tara pöata te hatakui hanige rien. ⁹⁻¹⁰E hatei nena, a Lo ima haka sil rai u katuun u matskö. E möa. A Lo i haka sile ii u katuun tema kukutieri a Lo tere Sunahan, na u katuun te hipus rer u katuun te mammamir, na u katuun tema tara mareieri e Sunahan bate kato homir, na u katuun te katoeier a manka tema ngilenei e Sunahan na tema tara mareieri e Sunahan bate hakats nitöa ner a manka ni puta. A Lo i haka sile ii u katuun te puli rer u tamaren tsi u tsinaren na u katuun u hihipuli na u katuun u tsiktsikolo na pal tson na touhaliou te hiakaka gono poutsur, na u katuun te kop rer a palair u katuun bate hahol raren, na u katuun u gamogamo. Na mamanaka tema niga neia i matana e Sunahan. ¹¹Na u hihatuts u mana na u niga nitöa te matsköna turu Bulungana u Niga te halei lia e Sunahan te pan saluhena, nonei tego hihatuts hamatskö ni lia.

E Pol e haniga uana tere Sunahan te taatagi merien

¹²Alia e haniga koruegu e Iesu Kristo a Tsunono i tarara, te hatagale ioulia, taraha nonei e tari tu kui haniga uu lia ba nonei e lu mena nei lia tara toukui i tanen. ¹³Noahasina ti roron ranga hohomi sil menaien lia i manasa na tu kato hohomi menai lia u katuun i tanen. E Sunahan e taatagi naiou lia, taraha alia u hahamana naien batema atei silegi a ka ti kati lia. ¹⁴Ba lia e saputu megu a niniganiga tara Tsunono me tapiou menama u nihamana na u ngilngil te kana tere Iesu Kristo.

¹⁵ U raranga teka e mana nitöana na u katuun hoboto egi hanigeien. Na e markato uana teka, e Iesu Kristo e la sileiema i puta tegomi lu pouts meraien u katuun u omi. Na lia a töa teka tu omi koru. ¹⁶ Nonei teka ti mar lu sila menai lia, alia a töa katuun a omi hataia nitöa, kaba tara nitaatagi tere Iesu Kristo ba nonei e haröto nena te antunan hahaloso uanen, me kato here nanei lia u haharuei tego haröto menaien lia turu katuun te ngilin hamana uar i tanen, bate lue riou a nitöatöa te ka nitöana. ¹⁷ Aragi solosei a Kingina tara mamana pöata, nonei puku a King teka tema antunan mate nei na tema antunan tara nari. E Sunahan nonei a töa puku. Aragi solosei nitöa naien tara mamana pöata. U mana.

¹⁸ O Timoti a pien i tar, alia e hale gilö u raranga u tagala teka. E matsköna turu raranga tere Sunahan te ranga sil menaien lö i manasa. U raranga teka e tatei kato hatagale noulö balö te tagala silem a Tsunono, balö tena tatei hiatatung haniga gono meramou u pakö tere Kristo. ¹⁹ Alö go pile hakarapotein u nihamana i tamölö balö te atei silem alö u möa ta ka ta omi i tamölö. A palair u katuun e atei siler a ka te omina, kaba nori e kato noahaseren bate kato homi taleier u nihamana i taren. ²⁰ A maroro tala ti kukuti ere Himenias mere Aleksenda balia ena haka ragien i limana e Satan, ba nori te hatuts rari tegima ranga hohomi menaien e Sunahan.

2

Singo sil raiam u katuun hoboto

¹ U raranga tutuun i tar e mar la uana teka, singo sil raiam u katuun hoboto, singo sileiam

ta hitaguhu na limiou ego haniga be sil has ramen tere Sunahan. ² Singo sil has raiam u king na palair u katuun pan hoboto, ba ra te tatei karia tara masalohana bate kakamoto hanigara i matana e Sunahan na turu katuun hoboto. ³ A man mar singosingo teka e niga koruna, na e Sunahan te ngilin lu pouts ranou ra e haniga korue nen. ⁴ Nonei e ngilin lu pouts ranoura u katuun hoboto bate ate silera a ka te manana. ⁵ Taraha e Sunahan a töa puku, na e Iesu Kristo puku lahas te tuol na i gusura u katuun na e Sunahan. ⁶ Nonei e hala sile ii a peisanen tego sakahis meraien u katuun hoboto, bate haröto nena u ngilngil tere Sunahan i tarara, tere na pöata peisa noahas ien. ⁷ Nonei a ka te hala sile mei lia e Sunahan tego aposol uu lia i tanen, bate hatuts raiegu u katuun tema Jiu ri ba nori te tatei hamaner a ka te manana bate ate sileren. Alia ema gamogi. E möa! Alia e ranga hamanagu.

⁸ Alia e ngilegu a pal tson turu han hoboto, egi hasöani u ualima u gogoso te möa ta raharaha bate singo uar tere Sunahan.

A markato tara tahol

⁹ Na lia e ngil hasegu a touhaliou gi hasei u mar hasobö tega tara hanigaia i matar u katuun. Nori gi hasei mei u hasobö u hakats u niga. Nori gima hakats hapara nai tegi maman kato menaien a huluren bate hakeier a manka a man kankanaha na u hasobö na mamanaka a hihol i tanen te pan koruna. E möa. ¹⁰ Nori gi kato nitöani a man markato a man niga. A markato teka e matsköna tara touhaliou te poeier nori e hatsunoner e Sunahan. ¹¹ Alimiou a touhaliou go hahengo halongolo

tuun iam te hihatuts ria bate hala putemiou a peisa milimiou. ¹² Kaba lia ema hanigegi tega hihatuts uu a tahol bate mammam nena a tson. Nonei ga hahengo tuun lasi. ¹³ Taraha, e Sunahan e kato mami e Adam, ba nonei e töan katoeiena e Eva. ¹⁴ E Adam ima gamoei. E möa. E Eva ti gami me pekoena a lo tere Sunahan. ¹⁵ Kaba a touhaliou ena lu sila pouts raroua tena posa mera roien a galapien, na tena hamana nitöa uarouen tere Sunahan bate ngil raier a palair u katuun bate kamer u hakats u matskö na u niga.

3

A katuun pan turu Lotu ga hatarein a saha markato i tanen

¹ U raranga u mana e poeiena, “A katuun te ngilin katoena a toukui tara katunun pepeito kap turu lotu e ngilena a toukui a niga.” ² A katunun pepeito kap turu lotu ema tatei ka menei ta ka ta omi i tanen. Nonei ga ka mei a töa puku a tahol. Na nonei ga hakats haniga bate hala puteiena u ngil i peisanen bate kato hamatsköna. Nonei ga tara sil a taina katuun bate ngö menaneien i luma i tanen. Na nonei ga atein hihatuts has. ³ Nonei goma tatei ua hatutu ii na egoma katunun hiatatung ii na egoma ngil hasei a moni a parpara. E möa. Nonei has a katuun te tatei tuatamina turu katuun bate kato haniga ranen. ⁴ Nonei e antunan tara kap haniga nena a tahol na galapien i tanen na galapien e tatei hengo haniga hase ren na e tatei tara marei hase ren. ⁵ Taraha, tema antunan tara kap haniga nanei a tson a tahol na galapien i tanen, nonei ma antunan tara kap

haniga has nanei a hun katuun tere Sunahan. ⁶ A kristen a tsimus ma tatei lue nei a toukui tara katunun pepeito kap turu lotu. Nonei e namots ranga sesei nena a peisanen pouts bate lueiena a nihahuna te lui e Satan. ⁷ A katunun pepeito kap turu lotu ega markato uu tegi tara marei u katuun tema hamanari. Nonei e namos kurapa mena a nimatsingolo, bate tanga noa tara tanga tere Satan.

U katunun hihitaguhu turu lotu

⁸ U katunun hihitaguhu turu lotu egi kato haniga has, batema ka meri u huol u baku. Nori egima antunan ua haparei u uain bate ua hatutur na nori egima gono bei a peisaren a mamanaka. ⁹ Nori egi pile kap hakarapotein a mouna u nihamana batema katoeri ta ka tega hamatsingolo raien, na nori egi ka mei u hakats u gogoso. ¹⁰ U katuun teka egi torohana mam bir, te hatara na roien nori e ka mer u baku u matskö, ba nori te tatei lue riou a toukui tara katunun hihitaguhu turu lotu. ¹¹ A touhaliou has i taren egi kato haniga batema katoeri tu ranga te poeiena a tana katuun e kato homina. Nori e tatei hakats hanigar bate pakokeier a mamanaka te katoe ren.

¹² A katunun hitaguhu turu lotu ega ka mei a töa puku a tahol i tanen, bate tara kap haniga nena a galapien na mamanaka i tanen. ¹³ U katuun te kato hanigeier a toukui tara katunun hihitaguhu e lu beri a peisaren a nitaratara marei a niga, na e ka has meriou a nitagala te hamana uaren tere Iesu Kristo.

A mouna u lotu i tarara

14-15 Alia ena la guma romana, kaba lia e koloto megi a man raranga teka i tamilimiou tena mots hamokomoko ua guma lia, ba limiou te atei sile mou ime tego markato uaiam limiou turu katuun hoboto tere Sunahan. Taraha nori a luma* tere Sunahan te töatöa nitöana, na nonei a mouna u nihamana. ¹⁶ Na ra hoboto e hia hanhaniga ner u lotu i tarara e ka mena a mamanaka a niga koru te haröto halakasa ner:

E Kristo e butun Katunuma.

U Namnamei u Göagono e harötein te matskö uanen.

U angelo i tareien.

U katuun i habulungana naiien turu han hoboto.

U katuun e hamana uaier i tanen.

E Sunahan e lu pouts menaiien i Kolö.

4

A toukui tere Timoti i murimuri

¹ Hengo! U Namnamei u Göagono e ranga hale-salana bate poeiena, a palair u katuun e laba nariou romana u lotu hamana tara kapakapana a pöata. Nori e ngilin hengo rariou u katuun u gamogamo bate kukutier u hihatuts turu lilia-hanei u omi. ² U hihatuts teka e la nama romana turu ranga u gamo turu katuun u gamogamo tema matsingolo lel meri a ka a omi. ³ Nori ena hapiou nariou tegi hitöl uu katuun, na e hapiou ba has raroui a palaina a kannou te habuti e Sunahan egi lu mei u katuun te hamanar na te atei siler a

* **3:14-15:** A luma ema ranga nanei a luman sösoho, kaba e ranga nena u katuun te hamana uar tere Sunahan.

ka a mana, a niniganiga. ⁴ A mamanaka hoboto te katoe e Sunahan e nigana, ara gima hōanei ta tōa ta ka, aragi lu mei a mamanaka a niniganiga. ⁵ Taraha, u raranga tere Sunahan na u singo e kato hagōagonena a kannou i matana e Sunahan.

A katunun kui a niga tere Iesu Kristo

⁶ Te hatara namoua lö a manka teka turu hahinamölö na u toulamölö, alö a katunun kui a niga tere Iesu Kristo, e kato hatagale moilö a peisamölö na u rarangana tara nihamana turu hihatuts u niga te kukutie mölö. ⁷ Kaba, alö go hapolasa bani a man hahatate pinopinona i manasa, tema hani-genei e Sunahan. Alö go hahangeia a peisamölö a markato a niga tere Sunahan. ⁸ Te kato hatagale mia lö u tuenrei, e nigana. Kaba tego kato hagogoso mei lö u namnamei i tamölö te niga balana, taraha a markato teka e taguhe noulö tara nitöatöana i puta na tara nitöatöana i Kolö has. ⁹ U raranga teka e manana, na ra hoboto gi hamaneien. ¹⁰ Tara a nimanamana nen, ara e kui hatagala sil noahasera a ka a niga teka, taraha ara e hakera u nihamana i tarara tere Sunahan te tötatöana. Nonei te taguhu rena u katuun hoboto bate lu pouts rena u katuun te hamana uaier i tanen.

¹¹ Ranga balö te hihatuts nem a manka teka, a manka tegi hengoe. ¹² Alö a katuun a hitots, ego möa ta katuun tega pita putputeiou lö. Harötein ta markato ta niga turu katuun te hamanar te markato uana a katuun a kristen turu hihatuts i tamölö, na tara markato i tamölö na te ngil mera milö u katuun hoboto na te hamana ua mölö tere Sunahan, bate ka mem a markato a gogoso. ¹³ E

antunana tena la guma lia, alö go hatagala nitöani tego rit menai lö u Buku u Göagono turu katuun bate hahengor, balö te rararie men bate hihatuts has namen. ¹⁴Alö goma totonei a ka a niga te halei lö e Sunahan, ti hatagali a pal kapan turu kristen ti katoi u rangan propet bate hatakoper a limaren i tamölö. ¹⁵Kato hatagala nitöani a toukui teka bate hakats nitöa namen, bu katuun hoboto te tatei tarer a toukui i tamölö e tataalana. ¹⁶Tara hanigei temar ka uamölö na manka te hihatuts nemölö. Pile hakarapotein a markato teka, ba lö te taguhe mou a peisamölö na u katuun has te hengoe riou lö.

5

A markato te tatei katoe rara turu katuun te hamanar

¹Alö goma ranga sisi nai a katuun te tsonpan nenou lö. E möa. Alö go ranga hatami ia i tanen temar ranga mena milö e tamamölö. Na lö go kato rai a man hitots a man hahatoulana i tamölö. ²Na lö go kato rai a touhaliou pan u tsinamölö bate kato here has rami u kukubei u hahinamölö turu hakats u gogoso.

³Alö go taguhir u amoaba ti möa koru ta katuun tega taguhu raien. ⁴Kaba te ka mena a amoaba a galapien tsi a man hatutubunei i tanen, ba nori te hatutseria a peisaren tegi kato menaien a toukui i taren bate taguher a hun katuun i taren, ba nori te hamatana poutseier a nihhipakoko turu tamaren na u tsinaren. A markato teka e Sunahan e haniga korue nen. ⁵Kaba a amoaba te möa koru ta katuun tega tara kap naien, nonei e hakena u nihamana i tanen tere Sunahan bate singo hataatagi nitöa

uana i tanen tara lan na tara bong. ⁶ Kaba a amoaba te kukutiena u mamana u ngilngil turu tuenrei i tanen e here nei a tahol a mate, noahasina te töatöa noa uanen. ⁷ Hatagali u raranga teka turu amoaba bu katuun tema tatei ranga sil rarien. ⁸ Kaba tema tara kap nanei a katuun a sungutunen, e la bala uana tara tahol na galapien i tanen, nonei e holis has nena u nihamana turu kristen na nonei e omi bala nena a katuun te hahamanana.

⁹ A amoaba te kamena u 60 u hiningal, na te töli a töa puku a tson, nonei a amoaba te tatei hopö naria turu solo turu amoaba te tatei taguhu raier. ¹⁰ Na nonei has a amoaba teka te kamena a solo a niga tara man markato a man niga te kato mameien. Hena, te hatuts haniga raien a galapien i tanen bate tara kap haniga ranen, a solonen e tatei kana tara man solo. Na te taguhu haniga raien u katuun ti tuku ti lama tara tana han, bate galus hasena a mour u katuun u kristen na te taguhu raien u katuun te ka mer a siki bate torohanan katoena a mamana markato a niga, nonei e tatei hakoloto nena a solonen tara man solo.

¹¹⁻¹² Kaba, möa tu kolotein a solor u amoaba te kukubei noar. Taraha, u ngilngil i taren ena mots las halhal ba raneien e Kristo, ba nori tena ngilin hitöl lel riou i murimuri bate peko taleier u rangamana* ti katoeien tere Kristo. ¹³ Nori u amoaba teka toum e ka pinopino riou bate hula la uar tara

* **5:11-12:** Ukatuun ti mam mamin u lotu i manasa, toum romana i kato gono mei u amoaba u toböana na u tsonpan u hia hanhaniga tegi ma antunan hitöl pouts uaien bate kuieier a toukui tere Kristo.

man luma. Na nori toum e ranga pinopino sil hase riou a palair u katuun bate kato pinopino tunur bate ranga has ner a manka tegi ma ranga naien. ¹⁴ Na lia e ngil taleiegu u amoaba u kukubei gi hitöl bate posaposar bate tara kap rer a galapien na mamanaka i taren, bu katuun tema ngileri e Kristo tema antunan ranga hohomi rarien. ¹⁵ A palair u amoaba i laba hakapein e Kristo bate kukutier e Satan. ¹⁶ Te kana a amoaba tara pala tara tahol a kristen, haka ban ba nonei te taguhe nen. A hun katuun tere Sunahan ema tatei söate nei a nitiamu turu mar amoaba teka ba nori te tatei tara kap las nariou u amoaba hamana ti möa koru ta katuun tega taguhu raien.

¹⁷ U tsunono te kui haniger a toukui i taren egi hala rai u tara marei pan, e la koru uana turu tsunono te rararer na te hihatuts hasir. ¹⁸ Taraha, u Buku u Göagono e poeiena, “Alö goma kopo kap nai a runguna a bulmakau tara pöata te pita patspatsike nen u wit. Nonei e tatei nou hasina tara pöata te kui nen.” Na u Buku u Göagono e pei hasena, “A katuun te kuina ega lui a hihol i tanen.” ¹⁹ Möa tu hengo u kout tara tsunono. Te kana a huol tsi a topisa a katuun tegi hatangana hobotein a ka teka ba lö te töan hengoe men. ²⁰ Kaba te kato homi noahasina a töa katuun, ba lö te ranga hapiou namen i matar u katuun hoboto, ba nori te tatei matoutur.

²¹ Alia e hala hatagale goi lö u raranga teka i matana e Sunahan na i matana e Iesu Kristo na i matar u angelo u göagono. Alö go hengo hanigei u raranga teka batema kato homie mi a tana katuun. Alö go markato merai u katuun hoboto

iesana. ²² Na lö goma hasese nai tego hatakopo menai a limamölö ta töa ta katuun bate hopö kap namen tara toukui turu kristen. Taraha, alö e namots heremi a hahuol i tanen tega kato homi uen romana. Alö go tara kap nitöani a peisamölö balö te gogoso nitöamia i matana e Sunahan.

²³ Möa tu ua puku lasi u ramun, ua hasi a tsi tabubun uain bate taguhena a torimölö na siki has te roron lue noulö.

²⁴ A palair u katuun te roron kato homir a markato i taren e hatara mareiena na e haröto nena tena lu mena roien a nihahuna. Na markato a omi tara palair u katuun ema atei sileri, kaba ena lakasa moto nou i murimuri. ²⁵ Na te kato has uana a markato a niga, e atei sil haseier, na markato a niga tema lakasa noa nei ena lakasa moto has nou i murimuri.

6

¹ U katuun te karia tara tou kits turu katunun kukui puku egi tara marei a tsunono i taren bate solosei raren. Taraha, u katuun e namots ranga hohomi ner a solo tere Sunahan na u hihatuts i tarara. ² A katunun kukui puku te ka na tara katuun pan te kamena u nihamana goma tatei omieien, noahasina te pala uanen tere Kristo. Nonei ega ngil korueien bate kui hatagala koru beienen, taraha, nonei e kui beiena a katununa turu nihamana.

U hihatuts u gamo na u mana

Alö go hihatuts hatagalein a manka teka. ³ A katuun te hihatuts nena u hihatuts u gamo ema tahongo neia turu hihatuts tere Iesu Kristo a Tsunono i tarara, u hihatuts u niga na u mana.

⁴ A mar katuun teka e ngil koruena a peisanen na ema atei silenei ta ka, na e ngilin ranga sisi tuun mena u ranga. A markato teka e habutena a hiomimi ba katuun te ranga homi nena a tai, bate hiahakhakats homir bate hiangenngenar. ⁵ A hiaraharaha te katon toa naier u katuun teka, u baku tutu tema atei sil haseri a ka a mana ba nori te poeier, u lotu a maroro te tatei lu sila namialö ta moni.

⁶ A hihol pan e tatei lue mialö te hapan mena mi lö e Sunahan bate sasaala mem a manka te ka memölö. ⁷ Ara ima la memei ta ka tara pöata ti posa raira, e möa. Na ra ema tatei la has mereri ta ka tara pöata tena mate rouara. ⁸ Kaba ragi masa mei te ka menarei ra a kannou na u hasobö. ⁹ U katuun te ngilin ka mer a mamana a parpara e tutu lala tuun rena bate rus beier a maroro tara markato a omi. A maroro teka, a tanga turu mamana u ngilngil u omi na u tutu te antunan las mena nei a katuun tara han a omi i hel. ¹⁰ Taraha, u ngilngil tara moni a mouna koru a mamana markato a omi. Turu ngilngil pan koru tara moni ba palair u katuun te hapolasa susuler a markato te hamana uarara tere Sunahan bate katoeier a mamana a omi te kato hakamitsena a peisaren.

U hihatuts te la hamatskö uu tere Timoti

¹¹ Kaba lö o Timoti, alö a katuun tere Sunahan, ka halehana ban a manka teka. Torohanan tagala sil tego kato hamatskö uu lö bate kato haniga mia i matana e Sunahan bate hamane men. Alö go ngilir u katuun hoboto bate tuatami mia i taren na lö goma sökana has ii. ¹² Tagala sil e Sunahan ba lö te hamana haniga uam i tanen. Pile hakarapotein a nitöatöa te ka nitöana. E Sunahan e ngö sile

ii lö a nitöatöa teka tara pöata tu ranga hanigaia lö i matar u katuun u parpara temar hamana uamia lö i tanen. ¹³⁻¹⁴ Alö go pile hakarapotein u raranga tere Sunahan batema kamenei tu korkoriana e antunana tena la pouts nama romana e Iesu Kristo te ranga hanigein u raranga u mana i matana e Pontias Pailat. Alö go hengo hanigei u raranga tere Sunahan, ba u katuun tema tatei ranga homi naroi lö. Alö go markato uu teka e antunana tara pöata te butu pouts nama romana e Iesu Kristo a Tsunono i tarara. ¹⁵ Nonei e butu nama romana tara pöata te haniga hakapein e Sunahan. E Sunahan a töa puku te pan saluhena na mouna a nisasaala. Nonei te King pan rena u king hoboto na te Tsunono pan rena u tsunono hoboto. ¹⁶ Nonei a töa tema antunan mate noi na nonei e kana turu ualesala pan tema antunan la hasukusuku uari u katuun. E moa ta katuun tega antunan tareien i manasa na ema antunan tara noahas nari i romana. Aragi soloseien, nonei te tagala saluhe nitöana. U mana.

¹⁷ Hateir u katuun te ka mer a mamanaka a para i romana gima solose ii a peisaren. Nori gima hasolaia tara moni tuun te antunan taia boroborona. E möa. Nori gi hasolaia tere Sunahan a tatangana koru te hala raneira a mamanaka te kato hasasaala ranoura. ¹⁸ Hateiri egi kato haniga bate katoeier a mamana markato a niga. Nori egi tatangana bate hia halhala ner a manka i taren. ¹⁹ Te kato uarouen teka ba nori te haputu beri a peisaren a manka man niga hamana, a man kana i Kolö te taguhu ranouen i murimuri. Ba nori te antunan lue riou a nitöatöa hamana.

²⁰ O Timoti, tara kapiin a manka hoboto ti hale ii lö. Ka halehana ban u ranga pinopino tema hapane nei e Sunahan, na turu rangan raharaha turu katuun te gamor bate poeier e ka mer a niatei. ²¹ A palair u katuun e poeier e ka mer a niatei, kaba nori i laba hakapein a marorona turu nihamana.

E Sunahan e tatei taguhu ranou limiou.

Nonei talasi.

Alia e Pol

U BULUNGANA U NIGA
The New Testament in the Halia Language of Papua
New Guinea
Nupela Testamen long tokples Halia long Niugini

copyright © 2020 Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

PDF generated using Haiola and XeLaTeX on 8 Mar 2023 from source files dated 5 May 2022

03815460-d6a0-5a59-aa7b-2a4278f7e67d